

Pertanian moden tanaman kontan tingkat pendapatan

→ Langkah elak pesawah terus miskin, tidak bergantung subsidi: PM

Oleh Irwan Shafrizan Ismail dan Hazwan Faizal
 bhnews@bh.com.my

Putrajaya

Kerajaan mengenal pasti beberapa langkah untuk menangani kemiskinan pesawah yang selama ini bergantung kepada pemberian subsidi, kata Tun Dr Mahathir Mohamad.

Perdana Menteri berkata, ia adalah dengan meningkatkan kaedah pertanian secara moden selain menggalakkan pesawah memperuntukkan sebahagian tanah mereka untuk tanaman kontan seperti sayur-sayuran dan buah-buahan bagi meningkatkan pendapatan.

“Selama yang kita tahu, penanam padi adalah golongan miskin dan mereka bergantung kepada subsidi kerajaan. Kita kenal pasti beberapa perkara yang menyebabkan mereka terus dalam garis kemiskinan.

“Pertama, mereka mempunyai holding (keluasan sawah) terlalu kecil untuk memberi perolehan pulangan baik dan kedua, mereka tidak efisien,” katanya pada sidang media selepas mempengerusikan mesyuarat Majlis Tindakan Ekonomi (EAC) Bil 3/2019 di sini, semalam.



[FOTO MOHD FADLI HAMZAH / BH]

Dr Mahathir bersama Mohamed Azmin dan Saifuddin (kanan) pada sidang media di Bangunan Perdana Putra, Putrajaya, semalam.

Yang turut hadir, Menteri Hal Ehwal Ekonomi, Datuk Seri Mohamed Azmin Ali; Menteri Perdagangan Dalam Negeri dan Hal Ehwal Pengguna, Datuk Seri Saifuddin Nasution Ismail; Menteri Pertanian dan Industri Asas Tani, Datuk Salahuddin Ayub dan Pengurus Permodalan Nasional Bhd, Tan Sri Zeti Akhtar Aziz.

Dr Mahathir memberi contoh, sawah seluas 0.4 hektar boleh mengeluarkan lapan tanah hasil, tetapi yang berlaku cuma empat tanah hasil dikeluarkan.

Subsidi RM1.8 bilion

“Jadi, pesawah perlu meningkatkan kaedah penanaman dan cara penggunaan bahan. Kerajaan terpaksa bagi subsidi setahun RM1.8 bilion kepada 200,000 pesawah. Ini satu kos yang tinggi,” katanya.

Beliau berkata, kerajaan mahu pesawah dapat menghasilkan pengeluaran lebih banyak bagi setiap hektar dan pada masa sama, mahu menangani masalah kemiskinan penanam-

padi yang boleh meningkatkan pendapatan dan menjana pulangan lebih baik dengan menanam tanaman alternatif.

“Umpamanya, tanaman kontan yang boleh dituai tiga atau empat kali setahun, yang memberi pulangan lebih baik berbanding padi. Tanaman padi di Kedah dituai dua kali setahun, tapi tempat lain sekali sahaja, jadi pendapatan mereka berkurangan, sebab itu kita perlu melihat perkara ini secara menyeluruh.

Jaga keselamatan bekalan makanan

“Kita mesti menjaga keselamatan bekalan makanan. Kita perlu mengenal pasti bidang yang boleh dilakukan untuk sekurang-kurangnya membantu petani meningkatkan pendapatan dan pada masa sama, tidak membebankan kos kepada pengguna. Harga pengguna tidak boleh naik untuk menambah pendapatan petani,” katanya.

Dr Mahathir berkata kerajaan mahu mengkaji bagaimana pe-

sawah yang efisien boleh menghasilkan lapan tanah setiap 0.4 hektar dan menggunakan sistem mereka serta sistem lain untuk meningkatkan produktiviti pesawah.

“Sekiranya kita boleh mendapat lebih banyak lagi melalui penanaman tanaman lain seperti sayur-sayuran dan buah-buahan seperti harum manis (mangga), nanas dan semua itu boleh memberi pulangan yang lebih baik,” katanya.

Sementara itu, EAC dalam satu kenyataan, memaklumkan mesyuarat EAC semalam, bersejutu menghidupkan semula Majlis Produktiviti Negara (NPC) bagi menetapkan panduan dan hala tuju strategik serta macu agenda produktiviti negara secara menyeluruh.

“Keanggotaan NPC akan disusun semula supaya keahlianinya terdiri daripada mereka berpengalaman dan berkepakanan untuk mengenal pasti isu dan masalah produktiviti di semua peringkat,” katanya.